


北京圖書館
編

北京圖書館藏家譜叢刊
閩粵（僑鄉）卷

北京圖書館出版社

節堂祖世德堂祠址圖

吳堯階繪



節堂祖世德堂祠址圖

北京圖書館
編

北京圖書館藏家譜叢刊
閩粵
(僑鄉)卷

第 12 冊

北京圖書館出版社

吳亮階繪

節堂陳公祠

螺江逸叟陳敬右先生傳

禮夫有再娶之義是禮也特悼喪其偶未有似續者不得已而出此耳世風不古豪家富翁兒孫滿前猶且廣置後房何論再娶而西漢王少甫之言曰德非曾參子非華元亦何敢娶則後世無述焉然則如螺江逸叟者亦可以傳矣逸叟閩侯螺江人也螺江陳氏簪纓望族而更獨以農逸斯已難矣性孝友好德義讀書知大意不爲章句學幼侍父疾衣不解帶病革晝夜泣不食禱於神斬以身代卒不起哀毀不欲生方號踊間顧見母

鄭太君髻而哭且慟則嗚咽扶掖不敢聲而枕席間時有淚痕旣除喪有議姻者輒却之曰餘良未忘也居久之以太君命娶於林婉嫕得母歡每西疇春及夫耕妻饁相敬如賓歸必面母問安則色然喜乃適私室同產五人通力合作爲昆季先家庭無閒言食指日繁農隙則出就商業以佐不給稱小康焉方叟年未及壯遽賦悼亡有女甫三齡男生才十有一日耳越明年太君命納繼室則婉謝曰娶婦以養親中饋事兩嬖及諸弟婦任之且諳母食性兒亦已有子女倘繼娶不得人將爲

吾母憂兒甯鯨也以故母卒終不更言娶婦弟昆析爨
各能立家業孫子亦克負荷而叟亦已老矣桑田之外
果樹漫野每歲夏荔冬橘必分饋親故不專以販鬻爲
利然煙簑雨笠間猶見鬻鑠是翁與佃作等伍自謂樂
此不爲疲也天性勤儉布衣蔬食自奉甚薄惟親故有
不能自存者周恤無所靳爲人排難解紛片言輒感服
客秋鄉有老嫗黎明持甕出汲江潮驟漲失足墮時則
野無行人叟蚤起散步江頭適見之遽入水揪其髮以
上得不溺叟固善泅年逾古稀膂力猶過人抑非急人

之難者能若是耶好德如叟雖援天下溺可也逸云乎哉孔子曰吾未見好德如好色者也春秋之世沮溺丈人輩詎無若叟其人者蓋或有之而孔子固未之見耶丈夫子一德至世丈余一再晤長身清癯持論侃侃有國士風性亦孝友好行德義猶有父風卽生十有一日喪母者也孫男本震從余遊勗學尚德螺江陳太傅深器之前畢業鄉校高等班優等生咨獎增生繼畢業福建省立第一中學校最優等第三名復習路礦唐山大學僅年餘老成持重民國五年奔父喪旋里螺江太傅

稱其誠慤類乃祖精覈如乃父委以家政筦會計出納
謹慎民國十四年受福建侯鹽運使聘請爲諮議之席
次孫男本菁畢業鄉校高等班又畢業商業專門學校
精籌算善治產性亦謹愿曾孫男五人長已出就外傳
幼則尚在襁褓中綜叟生平孝於親篤於義直兒孫繞
膝之鰥老也康疆蕃祉厥有由來足以風矣叟之名旣
播於閭里且聞於國民國十有二年大總統曹特褒以
令德孔昭福建省長薩獎以齒德兼尊兩匾額以彰有
德洵盛典也叟名連爵譜名敬右不爲號鄉人敬其齒

德稱之爲螺江逸叟云

通家愚姪唐瀚波頓首拜撰

故兵科給事中河南提督學政陳君行狀

君諱瑋瑩號芸敏侯官陳氏幼貧喪母封公館於外君刻苦
劬學年十三補弟子員今大司寇師濟甯孫公視閩學拔貢
成均旋舉鄉試光緒二年成進士改庶吉士散館授編修遷
江南道監察御史擢兵科給事中庚寅充會試同考官乙酉
典試湖南戊子簡河南學政甫一年丁艱歸服將闋入京辛
卯九月二十三日卒年三十有九君本單門無期功之親先
娶大興李氏繼娶濟甯師四女孫氏均無出亡妾有子六歲
彌留書與夫人云閩人歸閩蓋可悲也吾閩自左海陳先生

父子後無言漢學者獨予與君少長相親深研故訓君既博覽又精於校讐累年架上所積皆祕本體弱易病北地秋寒嗽上氣咯血故亦不能多所撰述及將捐館舍盡取存橐燬之於是一字不落人間矣居諫垣時疏請明算者鄉試每百人取中一人得旨允行著爲例在湖南所取尤多知名士徒以賈志未遂雖早達而限於年生平纂記亦遂已矣何其酷也先是君悼亡廬里中西湖僧舍寫經資福邀余相過夜課無眠悽然有出世之感以余所居陽崎江山水之勝因約結鄰讀書終老余以君方顯用姑諾之不爲意也別不數

年竟哭君旅殯於長椿寺也豈不痛哉今遺孤甚穉寄居外
氏喪歸無日乃畧次梗概使後之傳文苑者有述焉光緒癸
巳行次高郵同年生葉大莊謹狀

[illegible]

皇清誥授中憲大夫江南道監察御史陳君墓誌銘

前山西布政使姻愚弟林壽圖拜撰

江南道御史編修陳君旣歿之明年將葬其子常賢以狀請
函文於余余與君先世有舊至君身重以婚媾義難於辭乃
據狀述之君諱懋侯字伯雙先世明贈徵士郎諱巨源者由
新甯入閩居螺江十四世諱宗履者以孝聞奉母遷會垣今
爲會垣人曾祖諱積善國學生祖諱兆鵬道光壬午舉人山
陽縣知縣以所治饑遽發倉賑千吏議負累萬金卒於官考
諱恭纘國學生皆贈資政大夫晉贈榮祿大夫曾祖妣魏氏

吳氏生曾祖妣林氏祖妣丁氏龔氏妣邱氏皆誥贈淑人晉
贈一品太夫人贈君四子長卽君次建侯次寶麟次毅侯皆
早世君與建侯生又同產故終始尤篤於愛建侯守德安及
陸安君尙以諸生隨邱太夫人就養官署年四十始以進士
起家官翰林越四年己卯視學蜀中奉內諱歸服闋入都乙
酉襄校順天鄉試戊子主試湖南辛卯三月補授今職六月
稽察豐益倉十月巡視東城壬辰十月十六日卯刻卒春秋
五十有六以甲午三月初五日祔葬北關外立沙山祖塋之
次君天性孝友幼失怙隨侍山陽公任每與建侯夜讀一念

邱太夫人苦節撫孤輒相持哭方建侯服官時太夫人年高疾不時至君考究醫理不更藥而愈及喪哀痛逾節未浹辰鬚髮白者半泊建侯歿於王事愈不樂每謂常賢曰爾凡事毋得視諸兄弟有父與孤懸殊也蓋篤於內行如此其在朝蒞官又能勤於所職督蜀學甫年餘去官日士民不忍別泊補今職則曰諫官當舉其大關於國計民生不宜訐直沽名章屢上留中不發草輒自焚前卒日猶疏請禁用非刑奉旨勅直省督撫遵行矣遽無疾卒嗚呼以君蓄積久充所施當無涯量乃始欲而嗇於遇今遇矣所施又未大豈天厚君

以德性不欲以政事爲君掩歟抑留以有待欲大啟於後之
人歟君生平經史皆有論著其傳於世者有知非齋易注易
釋原聘龔氏配郭氏妾高氏鄭氏子一卽常賢女七 銘曰
鳳之鳴以德輝兮將協應夫昌期迺朝陽倏爲夕晷兮孝友
未竟其施千秋隱耀片石銜悲

誥授中憲大夫江南道御史編修陳君誄

嗚呼伯雙而止於斯邪仕不究其志而用未彰於當世嗚呼
伯雙而止於斯邪余既哭其喪因次其事而誄之君爲人簡
默自重不肯 姁隨人後及處稠人之中未嘗必自異與人
言論終未嘗厲色疾聲也君兄弟四人其與君孿生者仲耦
閣學也閣學歷任湖北知府迎養母夫人君隨侍焉太夫人
年高多疾君未嘗須臾離左右病則輒索其源而藥之藥輒
應手而效非其苦心專壹積誠所致於病之絲毫纖悉何以
盡知治之何以盡善如是耶太夫人嘗病痢一夜數十起君